



Vicecampiun grischun cun l'arma da sport en venter è vegni Plazi Giusep Cadrui.



Tratg è er vegni en schanuglias. (da san.) Felix Pally ed Otto Bass.



Sco gia avant in onn campiun grischun: Urs Brazerol.

FOTOS G. N. STIGIER



Nagina medaglia per Guido Zellweger da Zernez cun la pistola.



In talent da tir: Kevin Plaz, oriund da Savognin.



Gudagnan las medaglias sin la distanza pistola 50 meters. (da san.) Roman Clavadetscher, Elmar Fallet e Ramon Cramer.

Noss matscheurs èn pronts per ils campiunadis svizzers

Tir campiunadi grischun 300 meters

DA GION NUTEGN STIGIER/ANR

■ **Tar il campiunadi chantunal armas 300 meters han Urs Brazerol, Georg Maurer e Hans Luzi Stucki defendi lur titels. Novs campiuns grischuns èn Hermann Jemmy e Norbert Caviezel. Victur da las duas categorias da pistola è danovamain Elmar Fallet sco gia il 2018.** Relaziuns tut auter che simplas tar il campiunadi grischun da l'elita da tir da noss chantun al stand da tir Rossboden a Cuira. Adina puspè èn l'illuminaziun e la glich sa midadas, uschè che mintga singul tiradur ha gi da sa concentrar anc pli fitg per sajettar precis. Dalla partida a l'occurrè da tir chantunala èn stads 140 tiradurs ed intginas tiraduras.

Tratg persvadent

Ina classa per sasez è stà Urs Brazerol (Farrera) cun l'arma da sport en la disciplina en venter. Il tiradur da 55 onns ha gist tratg da sis passas tschingt da mintgamai 97 puncts ed ina passa da 99 puncts. Il tiradur da la Val Alvra ha gudagnà la concorrenza cun in total da 584 puncts e vegni sco gia avant in onn campiun grischun. Vicecampiun grischun è

daventà Plazi Giusep Cadrui (Laax), e quai cun in resultat da 580 puncts. Il terz plaz ha cuntenschi Joos Ambühl (Tavau) cun in resultat da 577 puncts. Georg Maurer (Favugn) è vegni emprim en la categoria arma da sport duas posiziuns, e quai grazia a ses resultat da 586 puncts, in resultat excellent. Vicecampiun grischun è daventà Reto Branger (Tavau) e cumpletta il podest ha Otto Bass (Rabius).

Puspè Hans Luzi Stucki

Victur da la categoria arma da militar 57/03 è vegni Norbert Caviezel (Tumegl) cun sajettar 572 puncts. La medaglia d'argent quella ha retschet Andrea Stiffeler (Tavau) e quella da bronz Mauro Ardüser (Tumegl). Tratg è er vegni cun l'arma da militar 90 ed en quella categoria sa numna ul victur Hans Luzi Stucki (Valendau). Il pur e tiradur ha tratg 557 puncts, in punct dapli che Sepp Rupp (Cuira) e Rolf Brunner (Tavau).

Ulteriur success per Hermann Jemmy

En la concorrenza arma da militar 90 duas posiziuns è la victoria ida a Her-

mann Jemmy (Castrisch). Cun daventar campiun grischun cun il resultat da 537 puncts è la sia carriera da vaglia agiuntada cun in ulteriur success.

Be trais puncts damain ha sajettà Hans Peter Lötscher (Pany) ed il terz post ha obtegnì cun Otto Morell (Samedan) ina legenda dals tiradurs grischuns. Tar ils giuven arma da militar 90 sa numna la victura Saskia Plaz (Brugg/Savognin) ed da la categoria arma 57/03 è quai Serafin Wieland (Borgonovo).

Cun Elmar Fallet

Sco gia avant in onn ha Elmar Fallet (Müstair) er gudagnà sonda passada a Cuira omaduas categorias da pistola 25 e 50 meters.

En il program B, 50 meters ha il Jauner fatg 567 puncts e sin la distanza da 25 meters ha Fallet sajettà cun 578 puncts in resultat excellent. Sco ils auters matscheurs svizzers para er il dubelcampiun grischun 2019 d'esser pront per ils campiunadis svizzers che cumenzan en duas emnas a Thun. Elmar Fallet è gia il 2017 daventà campiun svizzer, avant in onn però renunzià a quel pervia da la chatscha.



Plaz da podest tar ils giuven. (da san.) Cyrill Gubser, Saskia Plaz e Madlaina Giovanoli.